

CONVENIO ENTRE A CONSELLERÍA DE CULTURA, LINGUA E XUVENTUDE DA XUNTA DE GALICIA E A FUNDACIÓN MUSEO DE ARTES DO GRAVADO Á ESTAMPA DIXITAL DE RIBEIRA PARA A REALIZACIÓN DO PROXECTO ARQUIVO BIBLIOTECA.

Don José Carlos López Campos, na súa condición de conselleiro de Cultura, Lingua e Xuventude, en virtude do seu nomeamento mediante o Decreto 44/2024, do 14 de abril, no exercicio das atribucións que lle confire o artigo 34 da Lei 1/1983, do 22 de febreiro, reguladora da Xunta e a súa Presidencia.

Doutra, Luis Antonio Pérez Barral, con NIF: 53483268B, na súa calidade de presidente da Fundación Museo de Artes do Gravado á Estampa Dixital, con CIF : G15798168 actuando en nome e representación da entidade, segundo as facultades que lle outorgan os seus estatutos, tal como figuran nos arquivos desta consellería.

As dúas partes interveñen en función dos seus respectivos cargos e no exercicio das súas facultades que para convir no nome das entidades que representan teñen conferidas, e,

EXPOÑEN:

As dúas entidades son conscientes da necesidade de actuacións de carácter sociocultural que permitan unha adecuada oferta, co obxecto de satisfacer as necesidades en materia cultural.

A Xunta de Galicia ten atribuídas funcións en materia de fomento da cultura, de acordo co establecido no artigo 27.19º do Estatuto de Autonomía, en consonancia co estipulado no artigo 148.1º.17ª da Constitución Española. Dentro de ese ámbito competencial, a Consellería de Cultura, Lingua e Xuventude desenvolve unha serie de actuacións encamiñadas á divulgación, información e promoción da cultura, para achegar o máximo posible o noso patrimonio cultural á sociedade en xeral.

A Consellería de Cultura, Lingua e Xuventude quere acometer a realización de actividades de promoción e divulgación do patrimonio e da cultura galega; mediante a programación de actuacións de recuperación da nosa cultura preténdese acadar unha maior eficacia na consecución destes obxectivos, por medio do desenvolvemento de actividades culturais e de fomento da cultura en lingua galega.

Con este convenio asegúrase a realización de diversas manifestacións da cultura galega levadas a cabo por entidades que a queren dar a coñecer, mediante a súa promoción dentro e fóra do noso país, coa organización de actividades que permitan un maior coñecemento dela.



A Fundación Museo de Artes do Gravado á Estampa Dixital (Artes, Ribeira) é unha fundación sen ánimo de lucro, que consta de tres salas expositivas, un arquivo e unha biblioteca de gran valor bibliográfico con máis de 8.500 volumes dende o século XV ata a actualidade. A colección de estampas supera os corenta mil rexistros, e abrangue dende incunables do século XV ata gravados de técnicas innovadoras do século XXI, o que o converte nun museo único en Galicia e en España. As súas coleccións conteñen estampas das escolas española, francesa, inglesa, flamenca, alemá, italiana e holandesa, ademais dun importante fondo de gravados de autores galegos de todos os tempos.

Ademais das exposicións realizadas durante todo o ano nas tres salas do Museo do Gravado cos seus fondos, realiza outras mostras con fondos cedidos doutras institucións, organiza cursos de gravado, cede as súas coleccións non só para exposicións en Galicia, senón tamén no resto de España e en países estranxeiros (México, Costa Rica, EEUU, Xapón, Portugal...) A todo isto cómpre sumarlle a edición de publicacións científicas para catalogar e difundir os seus fondos. Así editou xa os catálogos de Goya, Dalí, Van Dyck, Facal, Rubens, Toulouse Lautrec, Piranesi, Manuel Ayaso, Alfonso Costa, Emilio Celeiro, José Fuentes, Florencio Maíllo, Antonio Navarro, e outros moitos artistas.

Fundado en 2001, o Museo de Artes do Gravado foi declarado Ben de Interese Cultural e de Interese Galego xa no ano da súa fundación pola Xunta de Galicia (18/07/2001 e 30/07/2001, DOG de 24/07/2001 e DOG do 03/09/2001). No ano 2023 a Xunta de Galicia concedeulle o PREMIO DA CULTURA GALEGA na modalidade Artes Plásticas.

A Fundación Museo de Artes do Gravado colabora cos concellos do seu ámbito territorial, aos que cede exposicións dos seus fondos, pero tamén a entidades como as universidades de Santiago de Compostela, Cantabria e Salamanca, a Calcografía Nacional, o Museo Marítimo de Bilbao, a Real Academia de Belas Artes de San Fernando, o Instituto Cervantes en Nova York ou o concello de Guarda en Portugal, por citar só algúns exemplos.

Organiza o Museo exposicións anuais, que contan con visitas guiadas para escolares e público adulto, ademais de editar catálogos para as exposicións. No ano 2018 creouse a Escola de Gravado onde se formaron máis dun cento de alumnos/as e que continúa semanalmente con talleres de arte gráfica combinando así o noso labor de difusión e ensinanza. Nos últimos anos seguiron aumentando os fondos do Museo con novas adquisicións, pero tamén facendo melloras estruturais no sistema expositivo, na accesibilidade para persoas discapacitadas e en organizar e facer visible e accesible a súa biblioteca, entre outras



Anualmente convócase o Premio Internacional Atlante de Gravado, do que xa se organizaron catorce convocatorias, cunha gran participación internacional, sendo o gañador deste ano un tailandés.

Pero o Museo do Gravado de Artes necesita seguir crescendo, ofrecendo e mellorando a súa oferta cultural e a mellora das súas condicións para conservar os seus fondos, sendo necesarias distintas melloras como a realización dunha nova infraestrutura de almacenaxe para os fondos do Museo do Gravado.

Todos os fondos que contén o Museo do Gravado (estampas e libros) son de soporte papel e é moi importante mantelos de xeito adecuado a unha boa temperatura e grao de humidade nos depósitos dos seus fondos. Neste momento, o volume de fondos almacenados é de tal embargadura que é necesario poder habilitar un novo arquivo para albergar ditos fondos que cumpra as características mínimas de conservación. Ao tratarse de acervo en papel deben ser mantidas e observadas as normas de exposición para o Gravado, así que teríamos que ter unha temperatura entre os 18 ou 20 graos, humidade relativa na orde do 55% e unha intensidade de luz de 150 lux e unha colocación adecuada no caso dos volumes ilustrados. Sendo totalmente necesario o proxecto de arquivo de biblioteca para a conservación das valiosas obras en condicións óptimas de almacenaxe, de temperatura e humidade

O artigo número 5 dos estatutos da Fundación Museo de Artes do Gravado á Estampa Dixital din que *"A Fundación desenvolverá as súas actividades en todo o territorio español, no conxunto da Unión Europea e no ámbito internacional, especialmente, nos países americanos"* e no artigo número 6 especifícanse os fins da Fundación que, entre outros, indican:

- *O desenvolvemento e execución de Proxectos e/ou programas de investigación, estudos, formación, perfeccionamento e cooperación no ámbito da arte gráfica e en xeral das Artes.*
- *A promoción da actividade da arte gráfica e do seu desenvolvemento.*

A Fundación Museo de Artes do Gravado á Estampa Dixital vai realizar o Proxecto Arquivo Biblioteca.

Por isto, para acadar unha maior eficacia na execución de actuacións, dado o interese común das partes asinantes, que teñen intereses coincidentes, é polo que asinan este convenio de colaboración, de acordo coas seguintes,

CLÁUSULAS

PRIMEIRA.- Obxecto e actuacións.



O convenio ten por obxecto establecer as condicións polas que se rexerá a colaboración entre a Consellería de Cultura, Lingua e Xuventude e a Fundación Museo de Artes do Gravado á Estampa Dixital para realizar o Proxecto Arquivo Biblioteca.

Obxecto do Proxecto:

- Mellora das instalacións para mantemento de temperatura e humidade constante, que redundará na mellor calidade das obras (estampas e libros) do Museo do Gravado.
- Conservación e mantemento dos fondos do Museo do Gravado.
- Creación dun novo fondo de Biblioteca, con máis de 8.500 volumes.

Actuacións. Custo total: 30.855,00 €:

Adaptación rieis de luminarias, focos e guías colgantes para exposición.....	500,00 €
Suministro, colocación de rastrelado para división arquivo biblioteca na sala 2 (planta 3ª do Museo do Gravado con 2 paneis fixos e 2 portas de apertura interior simulando parede expositiva exterior. Medidas: 5,50 m x 3,62 m	5.500,00 €
Suministro, realización e colocación de estantería melamina branca soff de 8 metros lineais x 2,80 m de alto e 41 cm de fondo con portas cegas en todo o perímetro da zona baixa da estantería.....	5.000,00 €
Suministro, realización e colocación de estantería melamina branca soff de 8 metros lineais x 3,60 m de alto e 41 cm de fondo con portas cegas en todo o perímetro da zona baixa da estantería.....	6.500,00 €
Suministro, realización e colocación de estantería melamina branca soff de 4 metros lineais x 2,40 m de alto e 60 cm de fondo con portas cegas en todo o perímetro da zona baixa da estantería.....	3.500,00 €
Suministro, realización e colocación de estantería central melamina branca soff de 5 metros lineais x 1,20 m de ancho x 3,30 de alto e 41 cm de fondo con portas cegas en todo o perímetro da zona baixa da estantería.....	4.500,00 €
(ORZAMENTO SEN IVE).....	25.500,00 €
IVE	5.355,00 €
TOTAL	30.855,00 €

De acordo co artigo 26 da Lei de Subvencións non é posible promover a concorrência pública para a realización desta actuación, pola necesidade de atender áreas



específicas para a difusión dos recursos cos que conta a Fundación Museo de Artes do Gravado Dixital. O Museo do Gravado de Artes necesita seguir crescendo, ofrecendo e mellorando a súa oferta cultural e a mellora das súas condicións para conservar os seus fondos, sendo necesarias distintas melloras como a realización dunha nova infraestrutura de almacenaxe para os fondos do Museo do Gravado.

Por todo o anterior é a Fundación Museo de Artes do Gravado á Estampa Dixital a que posúe a especificidade como beneficiaria así como a da actuación subvencionada e o interese social da axuda concedida.

Así mesmo e de acordo coa planificación estratéxica realizada pola Dirección Xeral de Cultura, para o ano 2024, e dada a especificidade e exclusividade das actividades a realizar baseadas en criterios obxectivos, a sinatura deste convenio encádrase dentro dos previstos nese plan.

SEGUNDA.- Obrigas da Fundación Museo de Artes do Gravado á Estampa Dixital

A Fundación Museo de Artes do Gravado á Estampa Dixital comprométese, pola súa parte, a facer constar en toda a publicidade que xeren estas actividades –tanto impresa como audiovisual- a colaboración Xunta de Galicia, para o que utilizará a normativa da imaxe corporativa da Xunta de Galicia. Así mesmo comprométese ao cumprimento das obrigas contidas na Lei 9/2007, do 13 de xuño, de subvencións de Galicia e en especial as recollidas no artigo 11 desta norma. Tamén será de aplicación o establecido no Decreto 11/2009, do 8 de xaneiro, en canto non se opoña á lexislación anterior. Con carácter supletorio, será de aplicación o disposto na Lei 38/2003 xeral de subvencións e no seu regulamento, aprobado polo Real Decreto 887/2006, do 21 de xullo.

A beneficiaria deberá dar cumprimento as obrigas de publicidade que se establecen o artigo 18 da Lei 38/2003, do 17 de novembro, xeral de subvencións, modificado polo artigo 30 da Lei estatal 15/2014, do 16 de setembro, de racionalización do sector público e outras medidas de reforma administrativa.

A beneficiaria ten a obriga de prestar colaboración e facilitar canta documentación lle sexa requirida no exercicio das funcións de control que lle corresponden á Intervención Xeral da Comunidade Autónoma e ao Consello de Contas.

De acordo co artigo 38.3 da Lei 12/2006, do 1 de decembro, de fundacións de interese galego e co artigo 37.5 do Decreto 14/2009, do 21 de xaneiro, polo que se aproba o Regulamento do Rexistro de Fundacións de Interese Galego, con anterioridade á sinatura do convenio, será requisito indispensable atoparse ao día no cumprimento das obrigas de presentación das contas do padroado, o cal se acreditará cunha declaración responsable do órgano competente da entidade.



A Fundación deberá presentar certificacións acreditativas do cumprimento das obrigas tributarias, coa Seguridade Social e de non ter pendente de pagamento débedas coa Administración pública da comunidade autónoma.

A sinatura deste convenio implica, de ser o caso, a autorización á Consellería de Cultura, Lingua e Xuventude para solicitar as certificacións acreditativas de que se atopa ao corrente das obrigas tributarias estatais e autonómica e da seguridade social, así como que non ten pendente de pagamento ningunha outra débeda, por ningún concepto coa Administración pública da Comunidade Autónoma de Galicia, de acordo co establecido no Regulamento (UE) 2016/679 de protección de datos, na Lei Orgánica 3/2018, de 5 de decembro, de protección de datos persoais e garantía dos dereitos dixitais, disposición adicional cuarta da Lei 40/1998, de 9 de decembro, do imposto sobre a renda das persoas físicas e outras normas tributarias, e demais disposicións de aplicación.

De acordo co artigo 10 da Lei 9/2007, do 13 de xuño, a beneficiaria deberá presentar unha declaración responsable de non estar incurso en ningunha das prohibicións para obter a condición de beneficiaria. Esta declaración deberá presentarse antes da sinatura do convenio.

A Fundación Museo de Artes do Gravado á Estampa Dixital comprométese a destinar os fondos percibidos ao obxecto concreto para o que foron concedidos. A Consellería de Cultura, Lingua e Xuventude poderá comprobar, cando o considere pertinente, a execución das actividades obxecto deste convenio.

TERCEIRA.- Financiamento e compatibilidade

A Consellería de Cultura, Lingua e Xuventude comprométese a aboar a cantidade de 30.000 €, con cargo á aplicación orzamentaria 43.03.432B.781.1 dos orzamentos xerais da Comunidade Autónoma de Galicia para o ano 2024, código de proxecto 2015 00372.

Esta cantidade, 30.000 €, trátase dun importe certo, quedando por conta da beneficiaria a diferenza de financiamento necesario para a total execución da actividade subvencionada, debendo ser reintegrado o financiamento público unicamente no caso e polo importe que supere o custo total e real da actividade, segundo o establecido no artigo 21.2 do Regulamento de subvencións de Galicia.

Non se entenderá incumplida a obriga de xustificación das actuacións obxecto deste convenio no caso de variacións das contías previstas nas distintas partidas establecidas no orzamento estimado na cláusula primeira, cando obedezan a razóns xustificadas e as actuacións que se levaran a cabo garden relación directa co obxecto do presente convenio.



Conforme o disposto no artigo 40.1.d) do Regulamento da Lei de subvencións de Galicia, a achega económica prevista no presente instrumento será compatible con outras subvencións, ingresos ou recursos para a mesma finalidade, procedentes de calquera Administración ou entes públicos ou privados, nacionais, da Unión Europea e/ou organismos internacionais.

De conformidade co artigo 17.3 da Lei 9/2007, do 13 de xuño, o importe da subvención en ningún caso poderá ser de tal contía que, illadamente ou en concorrencia con outras subvencións, axudas, ingresos ou recursos, supere o custe da actividade subvencionada. En caso de superar procederá o reintegro do exceso obtido sobre o custo da actividade subvencionada así como a esixencia do xuro de demora correspondente.

CUARTA.- Xustificación dos gastos e pagamento

A xustificación do cumprimento das condicións impostas e do seu custo deberá levarse a cabo de acordo co previsto nos artigos 28 e seguintes da Lei 9/2007. A data tope de presentación da documentación xustificativa da actividade e, se fora o caso, da xustificación dos gastos que restasen por aboar ata acadar o 100% da contía concedida é o 30 outubro de 2024.

A documentación requirida na fase xustificativa presentarase electronicamente na Carpeta do cidadán da persoa solicitante/representante, <https://sede.xunta.es/carpeta-do-cidadan>.

A Fundación presentará electronicamente a xustificación da subvención, coa data límite establecida e incluírá a seguinte documentación:

- Unha memoria de actuación xustificativa do cumprimento das condicións obxecto deste convenio, con indicación das actividades realizadas e dos resultados obtidos. Nesta memoria deberase indicar o número de participantes nas actividades programadas e o impacto en medios de comunicación, prensa escrita e medios dixitais.
- Unha memoria económica xustificativa do custo das actividades realizadas que conterá:
 - Ü Unha relación clasificada dos gastos e investimentos da actividade, con identificación do acredor, do importe, data de emisión e data de pagamento.
 - Ü As facturas ou documentos de valor probatorio equivalente incorporados na relación a que se fai referencia no parágrafo anterior e a documentación





acreditativa do pagamento, dos gastos financiados con cargo á achega da consellería.

- Unha relación detallada, se é o caso, doutros ingresos ou subvencións que financiasen a actividade subvencionada con indicación do importe e a súa procedencia. No caso de non ter solicitado e/ou non ter recibido outros ingresos ou subvencións que financiasen a actividade subvencionada, deberán de presentar unha declaración responsable neste sentido.
- Os tributos son gastos subvencionables cando o beneficiario da subvención os abone efectivamente. En ningún caso se consideran gastos subvencionables os impostos indirectos cando sexan susceptibles de recuperación ou compensación, nin os impostos persoais sobre a renda. Na xustificación deberase indicar si son ou non susceptibles de recuperación.

A presentación desta información é requisito imprescindible para a tramitación do pagamento, devolvendo toda a xustificación que non o cumpra.

En todo o relativo aos gastos subvencionables deberá cumprirse o disposto no artigo 29 da Lei 9/2007, de 13 de xuño, de subvencións de Galicia. Cando o importe do gasto subvencionable supere as contías establecidas na Lei de contratos do sector público, para o contrato menor, o beneficiario deberá solicitar como mínimo tres ofertas de diferentes provedores, con carácter previo á contratación do compromiso para a obra, a prestación do servizo ou a entrega do ben, salvo que polas súas especiais características non exista no mercado suficiente número de entidades que as realicen, presten ou subministren ou salvo que o gasto se realizara con anterioridade á solicitude da subvención.

Subcontratación:

Poderán ser obxecto de subcontratación, total ou parcial, as actividades subvencionadas a través deste convenio, tendo en conta o disposto nesta cláusula e de acordo co establecido no artigo 27 da Lei 9/2007, do 13 de xuño, de subvencións de Galicia. En todo caso queda fóra da subcontratación aqueles gastos nos que teña que incurrir a entidade para a realización por si mesma da actividade subvencionada.

De conformidade co previsto na Lei 9/2007, de subvencións de Galicia, para efectos desta xustificación consideraranse os gastos realizados durante o ano 2024, dende o 1 de xaneiro ata a data tope de xustificación da axuda, que respondan á natureza da actividade subvencionada.

No caso de que a Fundación non xustifique ou a xustificación sexa insuficiente, procederá o reintegro das cantidades percibidas e a esixencia do xuro de demora



correspondente dende o momento do pagamento de subvencións ata a data na que se acorde a procedencia do reintegro.

Cando a actividade fose financiada ademais de con esta subvención con fondos propios ou con outras subvencións ou recursos, deberá acreditarse na xustificación o importe, a procedencia e a aplicación de tales fondos ás actividades subvencionadas. O importe das subvencións en ningún caso poderá ser de tal contía que illadamente ou en concorrencia con outras subvencións, ingresos ou recursos, supere o custo da actividade subvencionada. En caso de superar procederá o reintegro do exceso obtivo sobre o custo da actividade subvencionada así como a esixencia do xuro de demora correspondente.

QUINTA.- Pagamentos anticipados e á conta

A Fundación poderá solicitar pagamentos anticipados, por importe máximo de 15.000 €, que suporán entregas de fondos con carácter previo á xustificación, como financiamento necesario para levar a cabo as actuacións inherentes á subvención, de conformidade co disposto no artigo 63.1.2 do Regulamento da Lei 9/2007, do 13 de xuño, de subvencións de Galicia.

No caso de que a Fundación solicite pagamentos anticipados deberá presentar unha memoria xustificativa e económica na que se recollan as actuacións que ten previsto realizar co custo das actividades.

A Fundación tamén poderá solicitar pagos á conta, artigo 62 do Regulamento de Subvencións, que responderán ao ritmo de execución das actividades subvencionadas aboándose pola contía equivalente á xustificación presentada.

O importe conxunto de pagos anticipados e de pagos a conta que se concedan non excederá de 18.000 €.

O artigo 65.1 do Regulamento de subvencións de Galicia establece que os beneficiarios están obrigados á constitución de garantías cando se prevea a posibilidade de realizar pagamentos á conta ou anticipados; o artigo 65.4.i) recolle que quedarán exonerados da constitución de garantía os beneficiarios das subvencións concedidas cando os pagamentos non superen os 18.000 €.

SEXTA.- Comisión mixta de seguimento.

Créase unha comisión mixta de seguimento para aclarar as dúbidas derivadas da interpretación e execución deste convenio, formada polo director xeral de Cultura, da Consellería de Cultura, Lingua e Xuventude, e polo presidente da Fundación Museo de Artes do Gravado á Estampa Dixital Arte Contemporánea.

SÉTIMA.- Causas de resolución e modificación do convenio



O incumprimento de calquera das estipulacións deste convenio constituirá causa suficiente para a súa rescisión, e así mesmo procederá o reintegro da subvención cando concorran algunha das causas previstas no artigo 33 da Lei 9/2007, de 13 de xuño, de subvencións de Galicia.

As modificacións do convenio adoptaranse por acordo expreso e escrito das partes asinantes, e de acordo cos trámites que esixa a normativa vixente.

Segundo o disposto no artigo 31.4 da Lei 14/2013, do 26 de decembro, de racionalización do sector público autonómico:

"Os convenios subscritos pola Administración xeral da Comunidade Autónoma e as entidades instrumentais do sector público autonómico poderán ser obxecto de modificación cando teñan como finalidade o logro dos obxectivos de estabilidade orzamentaria e sostenibilidade e financeira.

Ditas modificacións terán por obxecto a redución do volume das obrigas ou a ampliación do seu prazo de execución."

OITAVA.- Publicidade e rexistro do convenio

As partes asinantes deberán cumprir coas obrigas derivadas da entrada en vigor da Lei 1/2016, do 18 de xaneiro, de transparencia e bo goberno. Para tal fin, as partes aceptan que o texto do convenio se publique no Portal de Transparencia e Goberno Aberto da Xunta de Galicia incluíndo os datos identificativos das persoas asinantes.

Así mesmo, a Fundación Museo de Artes do Gravado á Estampa Dixital acepta a remisión do convenio, logo da súa sinatura, ao Rexistro de Convenios da Xunta de Galicia.

De acordo co establecido no artigo 30 da Lei estatal 15/2014, do 16 de setembro, de racionalización do sector público e outras medidas de reforma administrativa, que introduciu diversas modificacións na Lei 38/2003, do 17 de novembro, xeral de subvencións, o contido deste convenio será publicado na Base de Datos Nacional de Subvencións, nos termos recollidos no artigo 20 da Lei 38/2003, do 17 de novembro, xeral de subvencións, modificado polo artigo 30 da Lei estatal 15/2014, do 16 de setembro, de racionalización do sector público e outras medidas de reforma administrativa.

Así mesmo, será obxecto de publicidade no Rexistro de Axudas, Subvencións e Convenios, ao abeiro do disposto no decreto 126/2006, do 20 de xullo e no decreto 132/2006, do 27 de xullo.

NOVENA.- Protección de datos de carácter persoal e garantía dos dereitos dixitais.



As partes asinantes comprométense a cumprir, en todo momento, as disposicións contidas na normativa básica estatal e autonómica que xustifica a lexitimidade do tratamento dos datos persoais e dereitos dixitais.

Na aplicación deste convenio respectaranse cantas esixencias establece o Regulamento UE 679/2016 xeral de protección de datos e a Lei orgánica 3/2018, do 5 de decembro (BOE 06/12/2018) de protección de datos persoais e garantía dos dereitos dixitais, adoptando cantas medidas resulten necesarias para cumprir as súas previsións e, en particular, para garantir a seguridade e integridade dos datos persoais e dos dereitos dixitais e, a súa protección fronte alteracións, perdas, tratamentos ou accesos non autorizados.

Serán de aplicación todos os dereitos e obrigas derivados da normativa aplicable en materia de protección de datos e garantía dos dereitos dixitais.

DÉCIMA.- Administración dixital.

As partes asinantes deste convenio respectarán cantas esixencias establece a Lei 4/2019, do 17 de xullo, de administración dixital de Galicia (DOG 26 de xullo de 2019), que será aplicable ao sector público autonómico, integrado, de acordo co artigo 3 da Lei 16/2010, do 17 de decembro, de organización e funcionamento da Administración xeral do sector público autonómico de Galicia, pola Administración xeral e polas entidades instrumentais e, tamén, será aplicable á cidadanía que ten o deber de utilizar os servizos públicos dixitais que se poñan a súa disposición de xeito adecuado, co respecto das normas de uso, xerais ou específicas, que se establezan para cada un dos servizos e, en particular, os cidadáns e as cidadás deberán utilizar os sistemas de identificación e de sinatura electrónicas de que sexan lexítimos titulares, usar a información dispoñible conforme a política de privacidade publicada e respectar a normativa en materia de protección de datos de carácter persoal (artigos 2 a) e b) e 7 apartados 1 e 2 respectivamente da citada lei).

DÉCIMO PRIMEIRA.- Xurisdición.

En todo o non previsto no presente convenio será de aplicación a Lei 9/2007, do 13 de xuño, de subvencións de Galicia e a súa normativa de desenvolvemento. Aplicarase con carácter supletorio a Lei 38/2003, do 17 de novembro, xeral de subvencións.

Será de aplicación a Lei 40/2015, do 1 de outubro, de réxime xurídico do sector público.

Este convenio ten natureza administrativa. A xurisdición contencioso-administrativa será a competente para o coñecemento de posibles cuestións litixiosas que poidan suscitarse como consecuencia del.



DÉCIMO SEGUNDA.- Notificación electrónica.

Segundo o artigo 14.2 da Lei 39/2015, do 1 de outubro, do procedemento administrativo común das administracións públicas, os colectivos que están obrigados a relacionarse a través de medios electrónicos coas administracións públicas, e polo tanto, a recibir notificacións por canles electrónicas son: as persoas xurídicas, as entidades sen personalidade xurídica, os colexios profesionais, os que representen un interesado que estea obrigado a relacionarse electronicamente coa Administración e, os empregados das administracións públicas para os trámites que realicen con elas por razón da súa condición de empregado público.

As notificacións realizaranse só por medios electrónicos a través do Sistema de Notificación Electrónica de Galicia Notific@, <https://notifica.xunta.gal>. Para poder acceder a unha notificación electrónica, o interesado deberá contar cun certificado electrónico asociado ao NIF que figure como destinatario da notificación (persoa física ou xurídica). Así mesmo, o interesado pode autorizar a calquera outra persoa a acceder ao contido das súas notificacións.

DÉCIMO TERCEIRA.- Vixencia.

O período de vixencia deste convenio será dende a súa sinatura e ata o 31 de decembro de 2024, sen prexuízo de que se subvencionen as actividades realizadas dende o 1 de xaneiro de 2024.

Ao estaren as dúas partes conformes co pactado, asinan telematicamente este convenio.

O conselleiro de Cultura, Lingua e Xuventude

O presidente da Fundación Museo de
Artes do Gravado á Estampa Dixital

José Carlos López Campos

Luis Antonio Pérez Barral

